

Bismillaah-Hir-Rahamaanir-Raheem

## Sacchī Kḥushī

### Zabur 1

Wo log kḥush haiñ

jo gunaahgaar logoñ kī salaah ko thukrā dete haiñ,

jo gunaahgaaroñ kī raah par naheen chalte,

yā un logoñ ko naheen apnaate jo Allaah taa'alā ko naheen maante.<sup>(1)</sup>

Balki wo log Allaah taa'alā ke qaanun par amal karne me kḥushī mahasus karte haiñ.

Aur din raat usī kā zikr karte haiñ.<sup>(2)</sup>

Wo us peḍ kī tarah haiñ jo ek nadī ke kinaare ugā huā ho,

jo bilkul sahī waqt par phal detā hai,

aur jiskī pattiyaan sukhtī naheen.

Wo log jo bhī kaam karte haiñ usmeñ unheñ kaamyaabī haasil hotī hai.<sup>(3)</sup>

Lekin gunaahgaar log aise bilkul naheen hote;

wo un sukhe tinkoñ kī tarah hote haiñ ki jinko hawā uḍā le jaatī hai.<sup>(4)</sup>

Allaah taa'alā gunaahgaaroñ ko sazā degā,

aur unko apne nek bandoñ se alag rakhegā.<sup>(5)</sup>

Nek logoñ ko hī Allaah taa'alā kī hidaayat milegī aur wo mahafuz raheñge,

lekin gunaahgaar log tabaahī ke raaste par āge baḍh rahe haiñ.<sup>(6)</sup>